

YIPĪNDAR PABLO REMBICUACHIA CORINTO PĒNDAR UPE CORINTIOS

Pablo mahenduhasa Jesús reroyasar Corinto pendar upe

¹ Che Pablo, yande rivri Sóstenes reseve, oromondo co ore mahenduhasa opacatu pëu. Tūpa niha, güemimbotar rupi, che poravo apóstol che reco água. ² Aicuachía co che ñehe pëu, pe Jesús reroyasar peñemonuha vahe Tūpa upe tecua Corinto ve. Peicua niha pe ipehapri peico Tūpa upe nara ité Jesucristo rese peicose. Peicua avei niha Tūpa pe poravose oyeupe nara pe reco catupri água, inungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei. ³ Yande Ru Tūpa, yande Yar Jesucristo tape rovasa pe reco tupri água.

Jesucristo suindar porovasasa seroyasar upe

⁴ Che, “Aviye ndeu” aheño ité Tūpa upe pe recocuer rese yepi. Esepia, Tūpa pe rovasa ité Jesucristo rese peicose. ⁵ Ëgüe ehi secocuer pipe sui Tūpa ombou opacatu pe reco tupri catu água, pemombehu tupri vaheñã imbahecua, opacatu mbahe supi eté vahe cua tupri água avei. ⁶ Esepia niha, ore co ñehesa Jesucristo resendar pëu imombehusa pipe sui pe recuñaro uca ité. ⁷ Sese ndipoi eté que porovasasa Tūpa Espiritu

suindar ipane vahe p̄eu yande Yar Jesucristo yev̄i ãgua pesãrose. ⁸ Tũpa niha pe mov̄iracuaño itera pe rereco ari cañisa p̄ipe Jesucristo yev̄ise voi curi ‘tipo eme que mbahe t̄ei secocuer rese yuv̄ireco’ ohesave. ⁹ Ahe acoi omboaviye vahe ité oñehengagüer yande poravo Guah̄ir yande Yar Jesucristo rese yande reco ãgua.

Jesús reroyasar p̄ihañemoñetasa ndahoyoyai vahe resendar

¹⁰⁻¹¹ Che riv̄ireta, che amombehu potami mbahe p̄eu yande Yar Jesucristo rer p̄ipe. Esepia, Cloé mu pe mombehu yuv̄ireco cheu: “Oñemoiro-iro yuv̄ireco oyeupe ae” ehi. Sese aipo ahe p̄eu: pemboyoya catu pe p̄ihañemoñetasa, ndapeyemboyahoi chira peyesui. Peico catu pe yeaisusa p̄ipe. Ichui tahoyoya pe p̄ihañemoñetasa, tahoyoya avei mbahe pe remimbotar. ¹² Supi eté amove aipo, “Ore Pablo rupindar oroico” peye t̄ei; ambuae evocoiyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye t̄ei aipo peico. ¹³ ¡Cristo rumo v̄ireco porombohesa ndoyaho-yaho t̄ei vahe! ¿Che tie amano curusu rese pe angaipa rep̄irã? anise, ¿che rer p̄ipe tie peñeapiramo uca peico? ¹⁴ ¡Aviye Tũpa upe che ndopoãpiramoise! Crispo iyavei Gayo, ahe güeraño rumo añapiramo yuv̄ireco cuese. ¹⁵ Sese ndipoi chira “serer p̄ipe ñapiramosa” ehi vahe yuv̄ireco cheu. ¹⁶ Estéfanas r̄eta pendar avei añapiramo yuv̄ireco, ipare ndipo iri revo ambuae ava añapiramo vahecuer. ¹⁷ Cristo niha nomombehu che poroãpiramo ãgua. Ëgüe ehi rumo che

cuaita ñehesa ñepisirosa resendar mombehu ãgua tēi. Iyavei ndahei ñehesa yavai catu vahe aiporu. Esepia, nañomi potai eté que chñhi co ñehesa pñratagüer Jesucristo curusu rese imano agüer resendar ava sui.

Cristo Tũpa pñratasa, imbahecuasa avei

¹⁸ Esepia, acoi ava ocañi tēi vakerã upe co ñehesa curusu rese Cristo manosa resendar aviye ãgüe ehi tēi vahe viña. Yande ipñsiropri yaico vakerã upe rumo co ñehesa vireco ité Tũpa pñratasa, ¹⁹ inungar Isaiás rembicuachiagüer pipe aipo ehi: “Amocañira co ivi pipendar ava tēi mbahecuasa iyavei arocuara ava yaracua vai tēi vahe sui yaracuasa” ehi.

²⁰ ¿Mara ehi evocoyase co ivi pipendar ava imbahecua vai vahe, ava-ava tēi aracuasa cuapar avei, iyavei ñehe cua tupri ai vahe co ivi pipendar mbahe rese yuvireco? ¡Tũpa niha osecuñaro evocoi nungar mbahecuasa ãgüe ehi tēi vahe pipe!

²¹ ãgüe ehi eté oaracuasa pipe ‘toicua eme che recocuer ava oaracuasa pipe tēi’ oya. Yepe, “Co ñehesa Cristo resendar ãgüe ehi tēi vahe” ehi tēi ava yuvireco chupe viña, Tũpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

²² Che mu judío osepia pota tēi mbahe poromondiisa ipñratá vahe iva pendar yuvireco. Griego evocoyase osendu pota tēi ñehesa aracuasa resendar yuvireco no. ²³ Yande rumo, “Cristo omano curusu rese” yahe ava upe yaico. Amove judío upe mbahe tēi co ñehesa. Iyavei amove ndahei vahe judío, co ñehesa osenduse, aviye

acoi ãgũe ehi tẽi vahe yuvĩreco chupe. ²⁴ Yande rumo, Tũpa rembiporavo yaico vahe, que judío, anise que griego avei, yandeu co ñehesa Tũpa Rembiporavo Cristo resendar Tũpa pĩratasa ité, imbahecuasa avei. ²⁵ Esepia niha, ava upe, Tũpa suindar mbahe avĩye acoi ãgũe ehi tẽi vahe viña. Co Tũpa suindar rumo mbahecuasa avĩye catu vahe ité ava tẽi mbahecuasa sui iyavei acoi mbahe Tũpa suindar avĩye nipiratai vahe ava upe viña, ahe rumo ipĩrata catu ité opacatu ava tẽi pĩratasa sui. ²⁶ Che rivireta, peyemomahenduha catu co rese: Tũpa pe poravo, yepe pe pãhu pendar ndasetaimi imbahecua vai vahe ava rovaque yuvĩreco viña. Ndasetaimi avei pereco pe mu seco ivate vahe viña no. ²⁷ Evocoi ava, “Ndoicuai vahe mbahe yuvĩreco” ehi yuvĩreco pẽu viña. Tũpa rumo pe poravo evocoi ava imbahecua vai vahe mochi ãgua. Iyavei oiporavo ava pe pãhu pendar ndoicatu tuprii vahe yuvĩreco ava ipĩrata vahe Tũpa cuaparẽhi mochi ãgua. ²⁸ Oiporavo avei co ivi pipe ava remieroĩro seco mbegũemi vahe, ava seco ivi coti catu vahe pe pãhu pendar co ava seco ivaté vahe reroyi ãgua ²⁹ ‘toyemboivate ai eme que ava che rovaque yuvĩreco’ oya. ³⁰ Tũpa ité rumo yande mboyemboya Guahĩr Jesucristo rese, ahe avei ombou Guahĩr yande mboaracua ãgua, yande reco mohivi ãgua avei ‘toyuvĩrecoi cheu nara’ ohesave iyavei ‘ipĩsiropri toyuvĩrecoi’ oya yandeu. ³¹ Sese inungar aipo ehi ñehesa icuachiapri aracahendar pipe: “Acoi ava oyeecomboivate ai pota vahe, toyecomboivate catu yande Yar rembiapo rese” ehi.

2

Pablo omombehu curusu rese Cristo mano agüer

¹ Iyavei, che rivireta, che asose cuese, añehese pëu Tûpa suindar ñehesa supi eté vahe yipindar ndicuasai vahe pipe, nañehi co ivi pipendar tēi ava mbahecuasa pipe, ñehesa ivate ai vahe pipe avei. ² Esepia, acoi aicose pe pãhve cuese, ndachepihañemoñetai eté que ambuae mbahe rese; Jesucristo recocuer rese, yatica agüer rese catu ité che pihañemoñeta vichico. ³ Iyavei ndachepĩratatai, arirĩ avei che siquiyepave pëu che sose. ⁴ Iyavei acoi añehese ñehesa pĩsirosa re-sendar rese pëu, ndaiporui eté rumo ñehesa ivate ai vahe pe pihañemoñetasa rerova ãgua. Che rumo Tûpa Espĩritu pĩratasa pipe añehi pëu ⁵ ‘toyeroya catu Tûpa pĩratasa rese yuvireco’ che yapave pe yeroyaẽhi ãgua ava tēi mbahecuasa rese.

Tûpa oEspĩritu pipe oicua uca mbahe yandeu

⁶ Ore rumo oromombehuño ité aracuasa pëu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tēi, ndahei avei ava mborerecuar co ivi pipendar tēi aracuasa nungar. Esepia, ahe imborerecuasa ocañi tēi vaheã. ⁷ Oroñehi catu aracuasa Tûpa suindar ndicuasai vahe rese, ahe yipive vireco vahe ivi apoẽhi viteseve, ahe co omboyecua ramo vahe yandeu yaico vaheã teco ori apirẽhi vahesave. ⁸ Co ivi pipendar ava mborerecuareta rumo ndosenducuai eté co ñehesa. Osenducuse rumo mborerecuar Jerusalén pendar yuvireco viña, ndoyatica ucai chira yande Yar seco

ivate, porañete vahe curusu rese yuvireco viña.
⁹ Icuachiapri aracahendar pipe aipo ehi:

“Tūpa omoingatu mbahe ava guaisupar upe.
 Ahe rumo mbahe ndosepiai vahe ité
 ava yuvireco yepi, ndosendui vahe ité,
 iyavei ndoyembopihañemoñetaimi eté sese
 yuvireco no” ehi aracahe.

¹⁰ Tūpa rumo oicua uca Espiritu pipe yandeu cute.
 Esepia, Espiritu oicua tupri catu ité opacatu sec-
 ocuer oico.

¹¹ Ëgüe ehi eté, inungar opacatu ava pãhuve
 ndipoi eté que ñepei ava pihañemoñetasa oicua
 vahe, iespíritu güeraño ité oicua mbahe oime vahe
 ipiha pipe. Ëgüe ehi avei Tūpa Espiritu güeraño ité
 oicua Tūpa pihañemoñetasa. ¹² Yande evocoyase
 ndahei co ivi pipendar tēi espíritu yaipisi, Ëgüe ehi
 rumo Espiritu Tūpa suindar yaipisi yaicua vahe rã
 iporerecosa oporoaisusa pipe ombou vahe yan-
 deu. ¹³ Ahe niha oromombehu Tūpa Espiritu ore
 mbohe vahe, ndahei ñehesa ava tēi aracuasa sui.
 Ëgüe orohe co supi eté vahe ñehesa Espiritu suin-
 dar oromombehu Espiritu rese yuvirecoi vahe upe
 yepi.

¹⁴ Acoi ava ndovirecoi vahe rumo Tūpa Espiritu
 opiha pipe, ndoipisii eté mbahe Tūpa Espiritu suin-
 dar yuvireco. Esepia, chupe evocoi mbahe aviye
 Ëgüe ehi tēi vahe, iyavei ndosenducua catui eté
 yuvireco. Esepia, evocoi nungar mbahe sendu-
 cuasa Espiritu pipeño ité. ¹⁵ Acoi ava vireco vahe
 rumo Tūpa Espiritu opiha pipe oicatu opacatu
 mbahe cua ãgua. Ndipoi chira rumo ambuae
 ava ndovirecoi vahe Espiritu opiha pipe ahe ava

recocuer cua tupri ãgua. ¹⁶ Esepia, icuachiapri aracahendar pipe aipo ehi: “¿Ava vo oicua tẽira yande Yar pihãñemoñetasa viña? ¿Ava vo ombohe tẽira viña?” ehi. Yande rumo yareco yande Yar Cristo pihãñemoñetasa.

3

Pablo iyavei Apolos Tũpa upe oporaviqui vahe yuvirecoi

¹ Che rivireta, ndapeguata tuprii Espiritu reroyasa pipe; pe rumo peguataño vite ava tẽi pihãñemoñetasa rupi peico. Sese namombehu catui ñehesa yavai vahe Espiritu suindar pẽu. Esepia, pe pĩtanimi nungar vite tẽi pe pihãñemoñetasa Cristo rese. ² Sese che opombohe mbahe ndayavaimi vahe rese. Esepia, pĩtanimi ndoicatu vitei ocaru. Sese ocambu viteño tẽi. Cũritei rumo ãgũe peye vite ité. Esepia, pe ndapesenducua catu vitei eté Tũpa Ñhengagũer yavai vahe. ³ Peguata viteño co ivi pipendar pihãñemoñetasa tẽi rupi. Esepia, peyemoecatẽhi-tẽhi oyeupe, iyavei peñemoiro peyeupe pe pihãñemoñeta ndahoyoyai vahesa pipe. Pe evocoyase peyapo ava ndoicuai vahe Tũpa rembiapo nungar. ⁴ Esepia, aipo peyeño tẽi, “Ore Pablo rupindar oroico”; ambuae evocoyase, “Ore Apolos rupindar oroico” peye-peye tẽi pe yembohesa rese pe yeecopisa pipe. Aipo ehi vahe pe pãhuve inungar ava Tũpa ndoicuai vahe pihãñemoñetasa.

⁵ Pesendu che ñehe: ¡Che Pablo iyavei Apolos Tũpa rembiguai tẽi oroico! Esepia, yande Yar

niha ombou ñepei-peí mboraviquí yandeu chupe yayapo vaheerã. Tũpa upe ore poraviquisa pĩpe sui niha peroya yande Yar peico: ⁶ che rane inungar añoti vahe mbahe rãhi pe pĩha pĩpe; Apolos evocoyase inungar imboĩhusar; Tũpa rumo inungar omboori vahe pẽu. ⁷ Evocoyase ndiyai peyeroya mbahe tĩsar rese tẽi, imboĩhusar rese tẽi avei. Peyeroya catura rumo Tũpa rese. Ahe niha pe reco momirata catu pe rereco. ⁸ Ore rumo oyoya tupri oroyapo mbahe pẽu nara. Sese ñepei-peí Tũpa omboura porerecosa pe rese ore poraviquigũer rupi oreu. ⁹ Ore oroporaviquí vahe Tũpa upe. Pe evocoyase ivi nungar peico Tũpa poraviquí ãgua iyavei pe inungar Tũpa omopuha ramomi vahe oi peico. ¹⁰⁻¹² Che inungar oi apo cuapar oyapo rane vahe oi vĩracua ãgua, ãgũe ahe imombehu Cristo resendar ñehesa pẽu seroya tupri ãgua. Ndiyai eté yaroya que ambuae ava tẽi, Jesucristo gũeraño ité yaroyara. Ambuae evocoyase inungar oi aposar omopuha vahe ivĩracuasa harive, ãgũe ehi ahe pe monguerẽhi catu pe mbohe co ñehesa rese. Evocoyase inungar oi aposar amove oiporu mbahe ipocopi vahe oi apo ãgua yuvireco oro, guarepochi, anise ita avĩye vahe. Amove rumo oiporu avei ndipocopi vahe mbahe que ivĩrape tẽi, capihí, anise tacuar tẽi oĩguã yuvireco. ãgũe ehi aveira pe mbohesar yuvireco. Ahe ñepei-peí rumo iya oicua tuprĩra pe mbohe ãgua yuvireco. ¹³ Ahe iporaviquí agũer rumo ari cañise icuasa tuprĩra ñepei-peí yuvireco. Esepia, ahe ari pĩpe yande Yar oura tata reseve ñepei-peí pe mbohesar poraviquí agũer cua ãgua. ¹⁴ Acoi ava oporombohe tupri vahe

inungar ava oyapo oi ndocai vahe, ahe oipisira oporaviqui repri; ¹⁵ ambuae oporombohe rai vahe rumo inungar oi oyapo ocai vahe tēi, iporombohe agüer opa tēi etera ocañi. Ahe güeraño evocoyase oñepisiro sãira tata guasu sui.

¹⁶ ¿Ndapeicuai vo pe yande Jesús reroyasar Tũpa rēta nungar yaico? IEspíritu niha secoi eté yande piha pipe. ¹⁷ Oimese que ava yande pãhuve omomara vahe Tũpa rēta, Tũpa evocoyase omboura oñemoirosa ahe ava upe. Esepia, Tũpa rēta nimarai vahe ité; yande teieté niha Tũpa rēta yaico.

¹⁸ Peyembopa eme catu pe ae. Oimese que pe pãhu pendar oyeupe aipo “che yaracua tupri vahe aico” ehi vahe co ivi pipendar pihañemoñetasa rupi tēi, toyecomombegüemi rane oaracua ãgua. ¹⁹ Esepia, ava tēi aracuasa Tũpa upe ãgüe ehi tēi vahe. Inungar icuachiapri aracahendar pipe aipo ehi: “Ava oaracua raisa pipe oyeiti uca mbahe tēi pipe Tũpa upe yuvireco” ehi. ²⁰ Iyavei aipo ehi no: “Yar rumo oicua ava tēi yaracua rai vahe pihañemoñetasa, ahe ãgüe ehi tēi vahe” ehi. ²¹ Sese ndapeyecomboivate ai chira que ava tēi porombohesa rupi peico. Esepia, opacatu mbahe pẽundar ité: ²² ãgüe ehi eté che Pablo, iyavei Apolos, Pedro avei, opacatu ivi pipendar mbahe Tũpa omoime vahe yandeu, tecovesa, manosa avei, yasepia vahe, iyavei mbahe oime vaherã, ahe niha opacatu pẽu nara, ²³ pe niha Cristo upendar, Cristo evocoyase Tũpa upendar secoi.

4

Apóstol yuvirecoi vahe poraviqui agüer

¹ Iya aipo peye: “Co mbia Cristo povri pendar yuvirecoi, icuaita ité niha Tūpa suindar ñehesa oyecua ramo vahe rese iporombohe āgua” peyera oreu viña. ² Acoi vireco vahe ocuaitarā, iya ité omboyecua ocuaita mboaviye tupri. ³ Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu āgua yuvireco. Che avei ndaicuai eté che recocuer cuapa tupri. ⁴ Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vaherā pēu. Yande Yar rumo oicua. ⁵ Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesāro ranera rumo yande Yar yevi āgua. Ahe niha omboyecua opacatu mbahe ndoyecuai vahe, iyavei omboyecua para ñepeipei yande pihañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepeipei yandeu.

⁶ Che rivireta, che añehe cheyese ae, Apolos rese avei pēu mbahe tupri āgua rese ‘ore recocuer sui toyembohe yuvireco Tūpa remimbotar icuachiapri rupi tupri yuvirecoi āgua’ ore yapave pēu. Pe evocoyase, “Co mbia seco ivate catu vahe co ambuae mbia sui” ndapeyei chira pe yemboivate aisa pipe oreu. ⁷ ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tūpa suindar. ¡Sese ndiyai peyecombovate etepri co mbahe pereco vahe rese! ¡Aviye opacatu mbahe peyesui tēi pe reco vahe viña!

⁸ Ndoyavii pereco ité vahe opacatu mbahe pe

remimbotar viña, ndoyav̄i avei nipanei vahe ité Tũpa suindar mbahe p̄eu. Peyeupe revo ndoyav̄i mborerecuar guasu peico ore sui viña. ¡Ëgüe peye itera tarahu viña! Ahese, ore avei mborerecuar oroicora pe p̄ahuve viña. ⁹ Ore rumo apóstol oroico vahe ndoyav̄i cheu Tũpa ore renoi ipa t̄ei vahe ore mano t̄ei ãgua. Sese seroĩrombr̄i oroico inungar ava imboguaipr̄i yucap̄irã. Ëgüe orohe oroico opacatu ava rovaque, Tũpa rembiguai eta iva pendar rovaque avei. ¹⁰ Iyavei, “Cundayaracuai vahe” ehi rutei ava yuv̄ireco oreu Cristo rese ité ore recose; ahese avei rumo pe peyeapo imbahecua etep̄ri vahe peico Cristo rese pe recosa p̄ipe. Iyavei ore ndoyav̄i ndaseco p̄iratai vahe oroico ava rembiepiave; aheseve avei rumo peyecocomirata t̄ei peico. Ore seroĩrombr̄i t̄ei oroico, pe evocoyase ava pe mboetei guasu pe rereco yuv̄ireco. ¹¹ Cũritei ore oroicove v̄ite ité ore r̄iepor̄ehi p̄ipe, ore husei t̄ei iyavei ndore turucuai eté. Ava rumo evocoyase mara-mara t̄ei ore rereco yuv̄ireco. Iyavei ndorov̄irecoi ore r̄eta ité. ¹² Ore oroporav̄iquiño ité, oroyembogüerai t̄ei ipipe. Ava rumo iñehe mara-mara t̄ei eté yuv̄ireco oreu; ore evocoyase oromboyev̄iño iñehe mbahe tup̄ri p̄ipe chupe. Ore reca-reca catuño ité ore momara ãgua yuv̄ireco; ore rumo oroñemosañõ ité yuv̄ireco chupe. ¹³ Iñehe-ñehe t̄ei ore rese yuv̄ireco; ore rumo saısusa p̄ipe oromboyev̄i iñehe yuv̄ireco chupe. Ore rereco it̄i nungar t̄ei iyavei ore rereco inungar ava Ëgüe ehi t̄ei vahe yuv̄ireco. Cũritei Ëgüe ehi v̄iteño ité yuv̄ireco oreu.

¹⁴ Ndahei pe mochi ãgua aipo ahe icuachía p̄eu,

ẽgũe ehi rumo pe mboaracua ãgua tẽi. Inungar che rahir ité, che rembiaisu opovireco. ¹⁵ Esepia, yepe pereco ati pe pĩtĩvisar Cristo rese pe reco ãgua viña, ndaperecoi rumo setá pe yesupa. Esepia, che amombehuse niha ñehesa pĩsirosa resendar pẽu, ahese ramo peroya Jesucristo. Seroyasa pipe evocoyase che inungar pe yesupa ité aico pẽu. ¹⁶ Sese che aipota ité che recocuer moña peye.

¹⁷ Sese che amondo che rembiaisu Timoteo pẽu, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agũer rese che sose opacatu Jesús reroyasar ñemonuhasa rupi yepi. ¹⁸ Amove oime pe pãhuve oyeecomboivate ai vahe. “Ndou iri chietera revo cohav yande repia” ehi yuvireco cheu viña; ¹⁹ aso pĩhaiviño itera rumo pe repia yande Yar oipotase cheu. Ahese aicua tuprira oyemboivate ai vahe reco pĩratasa yuvireco. Ndahei chira iñehe güeraño tẽi aicuara. ²⁰ Esepia, Tũpa omborerecuasave, ndahei oñehe pipe tẽi oporocuai, opĩratasa pipe rumo ẽgũe ehi. ²¹ ¿Mbahe pĩha peipota peico? ¿Peipota pĩha che aso vaherã pẽu che ñehe pĩrata pe mboaracua ãgua mbahe pe rembiavi rese? Anise, pemoingatu rane pe recocuer, ahese asora mbahe tupri pipe pe piri.

5

Pablo oñehe ñepei Jesús reroyasar pãhu pendar oyemboaguasa vahe rese

¹ Ambuae mbahe, oroyandu ñepei mbahe tẽi pe pãhu pendar rembiapo oroico: oime aipo osi

recoyar rese secoi vahe. Ahe angaipa guasu oyapo oico. Tũpa reroyasarẽhi itẽ ndoyapoi evocoi nungar mbahe tẽi yuvireco. ² ¡Pe rumo peyeecomboivate ai peico! ¡Iyacatu rumo ndapeyembovıhai chira evocoi nungar mbahe tẽi repiase viña! Evocoi nungar ava iyacatu itẽ pemboyepepıra pe pãhu sui. ³ Yepe niha che teietẽ ndaicoi pe pãhuve viña, pe rese che mahenduhasa pipe rumo aicove itẽ pe pãhuve iyavei aicua voi etẽ aipo oyapo vahe mbahe tẽi recocuer inungar-ra aico vahe itẽ pe pãhuve viña. ⁴ Acoi peñemonuhase, che avei niha aicora pe pãhuve che mahenduhasa pipe, yande Yar Jesucristo pıratasa avei secoira pe rese. ⁵ Evocoiyase ahe ava timondosa Carugar povıve secocuerai mocañi ãgua. Ipipe sui iespıritu oñepısırora yande Yar Jesucristo yevıse curi.

⁶ Ndapeyeecomboivate ai chira peico co mbahe tẽi oimese pe pãhuve. Esepia, peicua niha co ñehesa aipo ehi vahe: “Yepe chĩhimi imondosa pan mboapeposa panguã rese viña, ahe rumo oiquepa tuprı panguã rese” ehi. ⁷ Evocoi ava rembiapo ai inungar pan mboapeposa pe pãhuve. Sese pemombopa pe pãhu sui peicoẽhi ãgua angaipa pipe peico vaherã inungar panguã ipıasu vahe ndovırecoi vahe omboapeposa oyese. Ëgüe peye itẽ niha. Esepia, yande Yar Jesucristo iparaisu omano yande repırã. Ëgüe ehi ahe inungar ovesa yucaprı angaipa mocañi ãgua judıo pieta Pascua pipe yepı. ⁸ Sese inungar judıo omboetei vahe Pascua pieta yuvıreco yepı omombopaño pan mboapeposa cuacua vahe oyesui pan ipıasu, ndayapepoi vahe rereco ãgua, Ëgüe yahe aveira

yaico yande reco piasu supi eté vahe pipe; yamombopara yande recocuerai yandeyesui, ahe ava reco momara-mara tēisa, mbahe naporai vahe avei.

⁹⁻¹⁰ Ambuae aicuachía vahe pipe aipo ahe pēu: “Ndapembor̄i chira ava oyemboaguasa-guasa tēi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upe tēi oyerure vahe” ahe. Co che ñehesa rumo ndahei Tūpa ndoicua v̄itei vahe upendar. Esepia niha, pe yepep̄i āgua ñepei reseve evocoi nungar ava sui, pesē itera co iv̄i pipe sui viña. ¹¹ Che niha aipo ahe icuachía pēu: ndapembor̄i chira que ava acoi “che Jesucristo reroyasar aico” ehi angahu tēi vahe, que oyemboaguasase, anise oipota raise que ambuae ava mbahe, oyerokūi tēi vahe que mbahe rahanga upe, iyavei imahechiroi ai vahe, caguar tēi vahe, anise imonda rai vahe. Evocoi nungar ava piri ñepei yepe ndapecarui chietera. ¹²⁻¹³ Cheu ndiyai eté ava ndoyuv̄irecoi vahe Tūpa rese recocuer rese porandu āgua. Tūpa ahe ava yuv̄irecoi vahe recocuer opara oicua coiye. Pe rumo pe cuaita ité Tūpa rese yuv̄irecoi vahe upe pe porandu āgua secocuer rese. ¡Sese pemboyep̄iño ité osi recoyar rese secoi vahe pe pāhu sui!

6

Ndiyai Jesús reroyasar serasosa ndahei vahe Jesús reroyasar mborerecuar rovai

¹ Ambuae mbahe no: Oime pe pāhu pendar “co mb̄ia oyapo mbahe tēi cheu” ehi vahe ambuae Jesús reroyasar upe. ¡Mahera peraso mborerecuar Tūpa reroyasarēhi upe tēi evocoi mb̄ia rembiapo

ai rese porandu ãgua! Iyacatu rumo Tũpa reroyasareta upe perasora secocuer moingatu ãgua yuvireco viña. ² Peicua niha pe Tũpa reroyasar peporandura ava ndoicuai vahe Tũpa upe secocuer rese yuvireco curi. Evocoyase, ¿ndapeicatuĩ pĩha co tecocuer mbahemi tẽi moingatu peico? ³ ¿Ndapeicuai vo yande avei yaporandura Tũpa rembiguai recocuer rese curi? Evocoyase, ¿peporandu catu itera co ivi pipendar tecocuer rese peyeupe yepi! ⁴ Perecose evocoi nungar mbahe tẽi peyeupe, ¿mahera peiporu ava ěgũe ehi tẽi vahe tũparo pendar upe mbahe moingatu ãgua! ⁵ Che aipo ahe ité pẽu pe chĩ ãgua: ¿Ndipoimi eté vo pe pãhuve que ñepeĩ yaracua vahe oĩcatu vahe que mbahe tẽi peyependar moingatu ãgua? ⁶ ¿Amove pevava peyeupe! ¿Ndahei co güeraño, oime avei pe pãhu pendar Tũpa reroyasar viraso ambuae omboetasa mborerecuar Tũpa reroyasarẽhi upe tẽi mbahe moingatu ãgua!

⁷ Supi eté evocoyia pe reco pipe peyavi guasu ité. Iya peñemosañora co mbahe tẽi pe mboetasa suindar upe viña. ěgũe ehi eté, iya mbahe pe reco vahe, “Toñomiño yuvireco” peyera chupe pe raso rãgũer sui Tũpa reroyasarẽhi mborerecuar upe viña. ⁸ Amove rumo pe avei peyapo mbahe-mbahe tẽi eté; peñomi avei pe mboetasa Tũpa reroyasar mbahe.

⁹⁻¹⁰ ¿Pe niha peicua acoi ava mbahe-mbahe tẽi aposar ndoyuviroiquei chietera Tũpa mborerecuasa pipe curi! Peyembopa ucai rene chupe. Esepia, acoi ava oyemboaguasa-guasa tẽi vahe, mbahe rahanga upe tẽi oyerocuĩ vahe, omen-

dasa sui oyemboaguasa vahe, cuimbahe pãve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava virocua yesapihaño tēi vahe mbahe tēi pipe ambuae ava mbahe, ahe opacatu ndoyuvirasoi chira ivave Tūpa mborerecuasave curi. ¹¹ Oime avei niha acoi pe pãhu pendar yipindar ēgüe ehi vahe yuvireco viña, cūrítei rumo opa pe angaipa imocañisa pe sui iyavei pe ipehapri peico Tūpa upe nara ité. Ahe, “Peyavi mbahe” ndehi iri pēu yande Yar Jesucristo rer pipe iyavei yande Ru Tūpa Espiritu pīratasa pipe avei no.

Yande rete ipehapri Tūpa upe nara yaguasaēhi āgua

¹² Iyavei ambuae mbahe: Supi eté niha “aviye que mbahe che remimbotar ayapo vahe” ehi vahe. Amove rumo co mbahe ndahei aviye vahe yandeu iyavei yandeu ndiyai evocoi nungar mbahe povrive nara tēi yande reco āgua. ¹³ Supi eté niha aipo ehi vahe: “Yande rembiyu yande aviter upe nara, yande aviter evocoyase yande rembiyu upe nara” ehi. Coiye rumo Tūpa opara omocañi evocoi nungar mbahe. Yande retecuer rumo ndicuai tai yaguasa tēi vahe, ahe rumo yande Yar upe nara. Yande Yar evocoyase yande retecuer upe nara secoi. ¹⁴ Inungar Tūpa ombogüerayevi yande Yar, ēgüe ehi aveira yande mbogüerayevi opīratasa pipe coiye.

¹⁵ Peicua niha yande rete Jesucristo upendar ité. Ndiyai eté evocoyase Jesucristo upendar

yande rete mondo ãgua cuña güetecuer omomondo-tõndõ tõi vahe upe. ¹⁶ Peicua niha pe aipo nungar cuña ndipihai vahe rese peicose, pe retecuer evocoyase ñepei vahe nungar ité pereco. Esepia, icuachiapri aracahendar pipe aipo ehi yandeu: “Yepe ñuvirío ava yuvirecoi vahe viña, ñepei vahe nungar ité rumo secocuer yuvireco” ehi. ¹⁷ Acoi ava secoi vahe rumo yande Yar rese, ahe secocuer evocoyase ñepeiño ité.

¹⁸ Peyepipi voiño catu ava yemboaguasa-guasa tẽisa sui. Opacatu ambuae angaipa ndahei yande retecuer rese nara ité. Acoi ava rumo oyapo tõi vahe mbahe cuña rese, güetecuer ae evocoyase omomara catu güembiapo pipe sui tõi. ¹⁹ ¿Ndapeicuai vo pe retecuer Espiritu Santo upendar ité secoi, iyavei ahe Espiritu Tũpa remimbou pe rese ité secoi? Sese pe retecuer ndahei pẽundar ité. ²⁰ Esepia, Tũpa yande rerocua oyeupe nara. Yande rumo yande repi chupe. Sese peyapo mbahe aviye vahe pe retecuer pipe Tũpa mboetei ãgua.

7

Poromboaracuasa mendasa resendar

¹ Cũritei amboyevira pẽu acoi cuese pe porandusa mendasa resendar peicuachía vahe imbou cheu. Aviyeño ité niha que ava ndomendaise viña. ² Pe aguasa-guasa tõiẽhi ãgua rumo peyacatu perecora pe rembireco, cuña avei evocoyase tovireco oyacatu omer yuvireco. ³ Cuimbahe tomboaviye omendasa güembireco rese iyavei cuña omenda vahe, tomboaviye avei mendasa omer rese. Ahe niha yande cuaita yamendase. ⁴ Esepia, cuña

omenda vahe güetecuer ndahe iri oyeupe nara vireco, omer upe nara ité rumo. Iyavei cuimbahe omenda vahe, ndahei avei güetecuer oyeupe nara vireco, ahe rumo güembireco upe nara ité vireco. ⁵ Ndiyai peatēhi oyeupe. Oyoya rumo, “Yayapo eme mbahe” peyese peyeupe pe yeroqui āgua Tūpa upe, ahe avīyeño. Ndiyai rumo peyoeya pucura, aviyeteramo ndapeñemosai chira, ipipe sui aviyeretamo Carugar pe ātoi tiētera.

⁶ Ndahei che opocuai ‘tomenda yuvireco’ viya pēu. ⁷ Che rumo aipota che nungar pe mendaēhi āgua viña. Tūpa rumo ombou yande yacatu yande recorã.

⁸ Iyavei ndomenda vītei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar. ⁹ Ndapeicatuise rumo pe ñemosa āgua, pemendaño. Esepia, avīye catu itera pemenda poropota rai rāgüer sui.

¹⁰ Che rumo amombehu omenda vahe upe ‘topoi eme cuña omer sui’ viya. Ndahei cheyesui tēi aipo ahe. Ahe rumo yande Yar porocuita ité. ¹¹ Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

¹² Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña secoi potaño itese sese, evocoyase ahe topoi eme ité güembireco sui. ¹³ Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoi potaño itese sese, evocoyase

ahe cuña topoi eme ité ichui. ¹⁴ Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tūpa rovaque. Ēgüe ehi aveira cuimbahe Jesús reroyasar virecose güembireco Jesús reroyasarēhi. Ēgüe ndehise rumo, tahir avei ndoyavii chira ndahei vahe Jesús reroyasar rahir yuvireco viña. Ahe tahir rumo Tūpa upendar yuvirecoira. ¹⁵⁻¹⁶ Sese pe, pemenda vahe ndahei vahe Jesús reroyasar rese, pepoi eme catu ichui; aviyeteramo pe recocuer sui pe mer oñepisirora. Iyavei pe cuimbahe, aviyeteramo pe recocuer sui avei pe rembireco oñepisirora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tūpa oipota mbahe tupri pipe yande reco āgua.

¹⁷ Co rumo mbahe: peicoveño yipindar pēu Tūpa ombou vahe rese seroyaēhi vitesendar pipe. Ahe aporocuai opacatu Cristo upendar ñemonuhasa rupi yepi. ¹⁸ Acoi Tūpa osenoise ava judío oyeupe nara, ahe judioño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco āgua. ¹⁹ Esepia, ndahei chira que judío, anise que ndahei vahe judío yaicose avīye catura yaico. Co rumo Tūpa oipota catu, “Tomboaviye opacatu che porocuita amondo vahe chupe yuvireco” ehi yandeu. ²⁰ Sese peicoveño peyacatu pe recocuer pēu Tūpa ombou vahe rese pe renoiēhi viteseve. ²¹ Pe mbiguai tēi peico vahe pe renoise Tūpa, pepihañemoñeta etepri

eme evocoiya pe recosa sui pesẽ vaherã rese. Pe-
 icatuse rumo, peyepipiño itera ichui. ²² Esepia,
 yepe pe mbiguai tẽi peico viña, peroyase rumo
 yande Yar, ahese inungar ndahe iri vahe mbiguai
 peico chupe. Iyavei pe no, ndahei vahe mbiguai
 tẽi peico vahe, yepe ãgüe peye viña, peroyase
 rumo Cristo, ahese sembiguai peico. ²³ Tũpa upe
 rumo perepí iteanga, sese ndiyai eté ambuae ava
 povrive tẽi peico. ²⁴ Sese, che rivireta, peicoveño
 itera pe recocuer pĩpe inungar yipĩndar Tũpa pe
 renoise.

²⁵ Cuñatai ndomenda vĩtei vahe resendar rese
 rumo ndarecoi Yar suindar che ñehe ãgua. Che
 rumo amondora che pihañemoñetasa yuvireco
 chupe. Esepia, yande Yar che paraisuerecosa
 pĩpe imboyeroyapri aico. ²⁶ Cheu aviye catuño
 ité ndomendai vahe ãgüe ehiño tẽise yuvireco
 viña. Esepia niha, tecocuer yavaí eteanga cũritei.
²⁷ Acoi pemendase, pepoi eme ité oyesui. Acoi
 ndapemendaise, ndapeseca iri chietera peye-
 upe. ²⁸ Pemendase rumo, ndahei angaipa iyavei
 cuñatai omendase, ndoyapoi avei angaipa. Acoi
 omenda vahe upe rumo yavai catura co ivi pĩpe
 yuvireco chupe. Sese che ndaipotai evocoi nungar
 mbahe pĩpe yuvireco vaherã.

²⁹ Che rivireta, aipo mbahe amombehu pota
 pẽu: ndipucuvei co ari naporai vahe yepota
 ãgua yandeu. Sese co pĩpe suive tupri omenda
 vahe toyuvirecoi ndomendai vahe nungar
 yande Yar rese opihañemoñetasa pĩpe. ³⁰ Acoi
 ndovihai vahe, toyuvirecoi eme oviharẽhisa
 pĩpe iyavei acoi oviharete vahe, ahe toyuvirecoi
 eme avei oviharetesa pĩpe, iyavei vırocua vahe

mbahe omahera, toyuvirecoi inungar mbahe ndovirocuai vahe omahera viña yande Yar rese opihañemoñetasa pipe. ³¹ Acoi ava ipihañemoñeta catu vahe co ivi pipendar mbahe poru ãgua, tipihañemoñeta eme evocoi nungar mbahe tẽi rese yuvireco. Esepia, co ivi pipendar mbahe yasepia vahe, ocañi tẽira.

³² Che ndaipotai co ivi pipendar recocuer rese tẽi pe pihañemoñeta etepri peico. Acoi mbia ndomendai vahe rumo, ipihañemoñeta catuño ité yande Yar rese imbovaha ãgua; ³³ omenda vahe rumo ipihañemoñeta avei co ivi pipendar recocuer rese tẽi, güembireco mbovaha ãgua rese avei. ³⁴ Evocoyase ndahei ñepepi opihañemoñetasa vireco. Ëgüe ehi avei cuña opihañemoñeta rereco; cuña ndomendai vahe, ipihañemoñeta yande Yar upendar mbahe rese, güetecuer iyavei oespíritu rereco tupri ãgua Tũpa upe. Cuña omenda vahe rumo ipihañemoñeta co ivi pipendar recocuer rese tẽi omer mbovaha ãgua oico.

³⁵ Che aipo ahe pẽu ‘mbahe tupri pipe toyuvirecoi’ viya, ndahei mbahe yavai vahe pipe pe reco ãgua. Che aipota ité pe reco catupriisa pipe yande Yar upeño ité mbahe peyapo vaherã pe recoeté pipe peico.

³⁶ Acoi ava ipihañemoñeta vahe güembirecovi rese omenda ãgua, “Aviyeteramo ayavira mbahe ichui iyavei niha osupiti ité imenda ãgua, sese aviye catu yamenda” ehise, toyapoño güemimbotar. Tomendaño ité güembirecovi rese. Esepia, mendasa niha ndahei angaipa. ³⁷ Acoi mbia rumo ndovirecoise que ocuaita omenda ãgua iyavei

oicatu ité güemimbotar apo, ipihañemoñetase ñepeí reseve güembirecoví rese omendaëhi ãgua, ahe aviyeño ité. ³⁸ Evocoyase acoi omenda vahe aviyeño; acoi ndomendai vahe rumo, aviye catuño ité.

³⁹ Iyavei acoi cuña omenda vahe, ahe ndiyai eté iyepepi ãgua omer sui imanoëhi viteseve. Omanose rumo ichui, ahese ramo ahe cuña upe aviyeño imenda iri ãgua güemimbotar rupi. Yande Yar reroyasar rese avei rumo omendara.

⁴⁰ Ndomenda irise rumo, aviye catuño itera. Ahe che pihañemoñetasa, iyavei revo ahe che pihañemoñetasa Tũpa Espíritu suindar.

8

Pablo oñehe tembihu mbahe rahanga upe tẽ seropovẽhepri rese

¹ Cũritei ambuae mbahe amombehura pẽu mbahe rahanga upe mbahe mĩmba yucapri seropovẽhepri rese. Supi eté aipo ehi vahe: “Yande opacatu yareco yande mbahecuasa” ehi. ¡Yande rumo, “Aicua tupri opacatu mbahe” yande hesa pipe yayeecomboivate ai tẽi! Yayeaisuse rumo, ahese yañepitĩvi catu Cristo reroya tupri ãgua.

² Supi eté yande, “Che aicua ité co mbahe” yahe tẽise que mbahe upe, ipane vite ité rumo icua tupri ãgua yandeu. ³ Yande rumo yasaisuse Tũpa, ahese Tũpa, “Co ava cheundar ité secoi” ehira yandeu.

⁴ Evocoyase co mbahe rahanga upe tẽi seropovẽhepri mbahe mĩmba yucapri hu ãgua rese añehe. Yande niha yaicua co mbahe rahanga ãgũe ehi tẽi vahe co ivi pipe, iyavei oime ñepeí güeraño ité Tũpa. ⁵ Esepia, yepe ava upe setá tũpa

ivave, ivive avei viña (setá iteanga niha oime tūpa angahu tēi, yar angahu tēi avei). ⁶ Yande rumo yaicua ñepeño ité Tūpa oime, ahe niha yande Ru opacatu mbahe aposar. ¡Evocoyase yande chupe nara ité yaico! Oime avei yande Yar ñepe vahe, ahe Jesucristo. Ahe ichui oime opacatu mbahe, ichui avei yaicove.

⁷ Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhãño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovēhepri, ipihañemoñeta, “Co mbahe roho tūpa rahanga upe seropovēhepri” ehi viteño yuvireco oyeupe. Ipipe sui omomara uca Tūpa rese opihañemoñetasa yuvireco. ⁸ Supi eté tembihu ndayande p̄t̄ivii Tūpa rese yaico vaheṛã. Ndahei mbahe roho husa pipe sui tēi aviye catura yaico iyavei ndayahuisse, ndahei chira mbahe tēi catu yaico. ⁹ Pēu niha aviyeño pehu viña; peicua catura rumo, aviyeteramo que Jesús reroyasar ndoicatu tupri vitei vahe pemboangaipa uca. ¹⁰ Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemonguerēhi aveira ihu uca ãgua chupe. ¹¹ Evocoyase co pe mbahecuasa pipe pemocañi uca yande rivri Tūpa rese noviracua tupri vitei vahe peico. ¡Cristo rumo omano ip̄siro ãgua! ¹² Esepia, pemomarase Tūpa rese ipihañemoñetasa, ahese pe ae peyemboangaipa uca Cristo amotarēhisa

pipe peico. ¹³ Sese yande mbahe roho husa pipe sui yamboangaipa ucase yande rivrĩ viña, ndayahu iri chietera evocoi mbahe roho yande rivrĩ mboangaipa ucaẽhi ãgua.

9

Apóstol Pablo ndoporandu potai oyeupe nara apóstol upendar mbahe rese ava upe

¹ Supi eté che aicatu avei apóstol upendar mbahe pisi ãgua viña. Esepia, che apóstol aico. Supi eté che asepia yande Yar Jesús iyavei che poraviquisa pipe sui niha peroya yande Yar peico.

² Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voĩño itera cheu. Esepia, che remimombehu pipe sui niha yande Yar peroya peico. Ipipe sui avei icuasa tupri apóstol che recosa pẽu.

³ Ahe ñehesa amboeyvi tupri ava che recoãha potasar upe yuvireco yepi. ⁴ Iya ité che remihura pisi, che iguarã avei pe sui viña. ⁵ Iyavei inungar ambuae apóstol viraso ité güembireco oyeupi yuvireco yepi, Jesús rivireta avei ãgüe ehi yuvireco, ãgüe ehi avei Pedro, ãgüe ahe aveira niha che viña. ⁶ ¿Ore güeraño tie Bernabé rese oroporaviquira ambuae mbahe rese ore recove ãgua? ⁷ Esepia, sundao nomboepi sundao güeco ãgua, ahe rumo oporaviquisa repri oipisiño. Iyavei ava uva tĩsar, ahe avei yaviyese, ohu güemitigüer. Iyavei ovesa rãrosar, ahe avei omohe ovesa cambi igua. ⁸ Che ndahei cheyesui tẽi aipo ahe pẽu. Esepia niha, Moisés porocuita pipe avei aipo ehi yandeu: ⁹ “Pemondo eme tĩvi yuru rese mbahe

icaruēhisa mbahe rāhii oicambese yuvireco pēu” ehi. Supi eté co Tūpa aipo ehi vahe ndahei tivi upeño. ¹⁰ Yande reco tupri āgua rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe rāhii, oyoya osāro mbahe oipisi vaherā oporaviquisa sui oyeupe nara yuvireco yepi. ¹¹ Evocoyase ore avei oroñoti Tūpa Ñehengagüer pe piha pipe ore pe mbohese. Sese aviyēño aveira oroipisise mbahe pe sui oreyeupe nara viña. ¹² Esepia, ambuae oicatu mbahe pisi āgua oyeupe nara yuvireco pe sui. Evocoyase ore avei niha oroicatu mbahe pisi āgua pe sui ore poraviquisa pipe viña.

Ore rumo ēgüe ndorohei eté. Esepia, ore oroñemosañi ité ‘tiñehe mara eme co ñehesa Cristo resendar rese yuvireco’ ore yapave. ¹³ Pe niha picua ité acoi oporaviqui vahe judío tūparove, ichui ocaru yuvireco. Esepia, yuvirohu mbahe roho Tūpa upe seropovēhepri tūparo rocarve yuvireco yepi. ¹⁴ Ēgüe ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oyapave oreu. ¹⁵ Che rumo ndaporandui eté mbahe pe rembiereco rese vichico pēu yepi. Ndahei ‘tombou mbahe yuvireco cheu’ che yapave aipo aicuachía imondo pēu. Che rumo evocoi nungar mbahe rese ayembovihaño ité. ¡Yepe che yucapri tēira tieporēhi viña, ndaporandui chietera rumo mbahe rese pēu! Esepia, namocañi potai eté co che yembovihasa cheyesui.

¹⁶ Che rumo amombehuse co ñehesa pīsirosa resendar ava upe, ndiyai ayecomboivate ai ipipe. Esepia niha, che cuaita ité yapo āgua iyavei, ¡chep-

araisu itera ndamombehuise ava upe co ñehesa viña! ¹⁷ Tũpa ndache cuaise oñehe mombehu ãgua viña, che rumo che querẽhisa pĩpe amombehuise, ahese aipĩsira Tũpa suindar porerecosa. Ëgũe ndahei rumo. Esepia, Tũpa che cuaisa pĩpe niha amombehu. ¹⁸ Ndaporanduise mbahe rese pẽu amombehuise co ñehesa pĩsirosa resendar, ipĩpe ayemboviha ahe che vihasa porerecosa nungar cheu. Yepe aicatu mbahe rese che porandu ãgua viña, che rumo ãgũe ndahei eté.

¹⁹ Yepe che ndahei ava povrĩve tẽi aico viña, che rumo che remimbotar rupi opacatu ava rembiguai nungar ayeereco ‘tasetá catu ava iquerẽhi vahe Cristo reroya ãgua’ che yapave. ²⁰ Esepia, aicose judío pãhuve, secocuer rupi aicoveño Yar upe imonguerẽhi catu ãgua yuvireco. Ëgũe ahe ité, aicose ava Moisés porocuita povrĩve yuvirecoi vahe pãhuve, che avei eté mborocuitavrĩve nungar aico. Ndahei rumo Moisés porocuita povrĩve ité aico imboaviye ãgua. ²¹ Iyavei ava ndoyuvirecoi vahe Moisés porocuita povrĩve, ipãhuve aicose, inungar ahe yuvirecoi, ãgũe ahe tuprĩ avei imonguerẽhi ãgua yande Yar upe vichico. Ndahei rumo Tũpa porocuita mboyeroyaẽhisa pĩpe aico. Esepia, Cristo porocuitavrĩve che recocuer. ²² Iyavei no, aicose ava yande Yar ndoviroya tuprĩ vitei vahe pãhuve, secocuer nungar tuprĩ avei aico Yar upe imonguerẽhi catu ãgua. Ëgũe ahe opacatu ava upe ‘toñepĩsiro catu ahe avei yuvireco’ viya. ²³ Che ayapo co opacatu mbahe ‘tasetá catu co ñehesa pĩsirosa reroyasar yuvireco’ che hesa pĩpe, ‘taipĩsi

avei co porovasasa oime vahe co ñehesa reroyasa pìpe' che yapave avei.

²⁴ Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerecosa yepi. Evocoyase inungar co ivava catu vahe, ãgüe peye avei pe recocuer pìpe Tũpa porerecosa pisi ãgua peico. ²⁵ Iyavei opacatu oyemoingatu vahe oguayì ãgua oñearo tupri opacatu mbahe tẽi sui oyemomaraẽhi ãgua yuvireco. Ahe ãgüe ehi porerecosa ndipocopi vahe pisi ãgua tẽi yuvireco. Yande rumo yayemomborarara porerecosa apirẽhi vahe pisi ãgua yaico. ²⁶ Evocoyase che avei, ndahei ava oyahuva-huva tẽi vahe nungar aico Tũpa remimbotar apo ãgua iyavei che ndaicoi ava iguayì tẽi vahe nungar. ²⁷ Che rumo mbiguai nungar che retecuer areco, amboyeroya uca pihañemoñeta tupriisa upe. Esepia, ndaipotai ambuae ava mbohe pare imombopri tẽi nungar guayisa sui che yereco ãgua.

10

Ndiyai aracahendar ava recocuerai rupi yaguata

¹ Che rivireta, che aipota pe judío peico vahe peyemomahenduha vitera aracahe yande ramoi guatasa rupi mbahe pĩtu Tũpa imboguata agüer rese. Iyavei para guasu Pĩra vahe avei osasa opacatu yuvireco aracahe. ² ãgüe ehi eté opacatu oguatase mbahe pĩtuvri rupi iyavei para guasu osasase yuvireco, ndoyavii ñapiramombri yuvirecoi Moisés recocuer rupi oguata ãgua aracahe. ³ Iyavei

oyoya guasu yuvirohu tembihu Tũpa ombou vahe chupe nara yuvireco, ⁴ opacatu guasu avei oihu ita sui Tũpa ombou vahe ihiguarã yuvireco. Ahe ita rumo inungar Cristo secoi opacatu iguatasa rupi yuvireco. ⁵ Yepe ãgũe ehi Tũpa opacatu yande ramoi judío upe viña, setá iteanga rumo ava ipãhu pendar ndahei aviye vahe ipiãha rupi yuvireco. Ipipe sui opa omano ivi iporupirẽhisa rupi aracahe.

⁶ Co opacatu mbahe sembiapogũer yuvireco ahe yande mbohe ãgua ‘toipota rai eme mbahe-mbahe tẽi inungar ahe ava yuvirecoi’ oyapave yandeu.

⁷ Sese yande ndayamboetei chira mbahe rahanga tẽi, inungar ahe ipãhu pendar yuvirecoi aracahe. Aipo ehi eté niha icuachiapri aracahendar pipe: “Co ava ocaru vahe, yuviroihu avei yuvinoi. Ichui yuviropũha, oyembovihanõ pieta apo yuvireco” ehi. ⁸ Ndayayemboaguasa-guasa tẽi chiaveira inungar ahe amove ãgũe ehi yuvireco. Ipipe sui tẽi ñepe arã pipe ahe opa omano veintitrés mil tupri yuvireco aracahe. ⁹ Ndayasecoãha-ãha tẽi chiaveira yande Yar, inungar ahe yuvireco. Ipipe sui oyeyucapa uca mboi osuhusa pipe yuvireco. ¹⁰ Iyavei ndayande ñehe mara-mara tẽi chira yande Aposar rese, inungar ahe ãgũe ehi yuvireco. Ipipe sui Tũpa ombou güembiguai ava yucasar ìva sui ahe ava yucapa ãgua aracahe.

¹¹ Co opacatu yande ramoi upe mbahe oime vahe aracahe icuachiapri yande ipa yaico vahe upe nara: “¡Peicua catu aipo nungar mbahe sui!” he ãgua yandeu. ¹² Sese yande “che aico tupri ité Tũpa rese” yahe vahe, yaicua catura rumo. Aviyeteramo yaviapira mbahe tẽi pipe. ¹³ Pe

recoãhasa rumo oyoya tupri ité ambuae ava recoãhasa rese. Pe rumo peyeroyaño itera Tūpa rese, ahe niha oicua pe yemoviracuasa, noñocuai chira tecoãhasa imbou pēu. Acoi mbahe tēi oimese pe recoãhase, Tūpa ombou voiñora pīratasa evocoi mbahe tēi sui pe sē ãgua, chupe pe ñemosa ãgua.

¹⁴ Sese che rīvireta, che rembiaisu, peyepēpi mbahe rahanga mboeteisa sui. ¹⁵ Ava niha peico pesenducua vaheṛā mbahe, evocoyase peporandu co che remimombehugüer rese peyeupe icua tupri ãgua. ¹⁶ Yaïhuse uva ricuer sovasapri, “Aviye ndeu, che Yar” yande hesa pīpe, ahese oyoya guasu Cristo rese yaico suvīpīpe sui. Yahuse co pan imboyaho-yahopri, ahese oyoya guasu yaipisi Cristo retecuer yandeyeupe nara. ¹⁷ Yepe yande reta yaico viña, opacatu rumo yahu ñepepi pan sui. Sese yande ñepepi vahe ité yaico.

¹⁸ Peyapisaca acoi ava aracahendar Israel recocuer rese. Esepia, acoi yuvīrohu vahe Tūpa upendar mbahe seropovēhepri, ahe evocoyase chupendar ité yuvīrecoi. ¹⁹ Che rumo, “Mbahe rahanga aviye vahe ité” ndahei, iyavei, “Mbahe roho icuavēhepri mbahe rahanga upe, aviye catu ité” ndahei avei. ²⁰ Co rumo, acoi ava ndoicuai vahe Tūpa oicuavēhe mbahe caruguar upe tēi yuvīreco yepi. Ndahei rumo Tūpa upe nara ité ěgüe ehi yuvīreco. Che evocoyase ndaipotai eté caruguar upe nara tēi ěgüe peye vaheṛā peico. ²¹ Peïhuse rumo yande Yar upendar ïgua, ndiyai peïhu avei caruguar upendar ïgua; iyavei pehuse yande Yar upendar mbahe, ndiyai avei pehu caruguar upendar mbahe.

²² ¿Yasecara pñha yande ae yande Yar ñemoiro ãgua yandeyeupe? ¿Yande rumo ndahei chira ipĩrata catu vahe yaico ichui!

Yande renosesa mbiguai tēi nungar yande re-cosa sui mbahe tupri apo ãgua

²³ Amove ava, “Aviyeño opacatu mbahe yayapo yande remimbotar rupi” ehi yuvireco viña. Ēgüe ehi eté niha, ndahei rumo opacatu aviye, ndahei avei co opacatu mbahe yande pĩtívii catu Cristo rese yande reco ãgua. ²⁴ Ndapesecai chira que mbahe aviye vahe peyeupe nara tēi, pesecara rumo ambuae ava upe nara.

²⁵ Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tũpa rese pe pihañemoñetasa momaraēhi ãgua. ²⁶ Esepia, ivi opacatu ipor reseve, ahe yande Yar upendar.

²⁷ Acoi Tũpa reroyasarēhi pe soho ucase oyepiri pe mbocarũ ãgua, peso potase ipiri, pehuñora mbahe imbouprĩ pēu. Ndapeporandui chira rumo sese chupe Tũpa rese pe pihañemoñetasa momaraēhi ãgua. ²⁸ Acoi ava, “Co mbahe roho icuavēhepri mbahe rahanga upe” ehise pēu, ndapehui chira ahe mbahe roho. Ēgüe peyera pēu imombehusar rereco meguaēhi ãgua, ava pihañemoñetasa momaraēhi ãgua avei. ²⁹ Supi eté che añehe co ambuae ava pihañemoñetasa rese, ndahei pe pihañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava piha rupi?” ehi vahe. ³⁰ Iyavei aipo ehira no: “ ‘Aviye ndeu’ ahese Tũpa upe mbahe ahu

vahe rese, ¿mahera pñha che reroĩrora yuvĩreco ahuse viña?” ehira. ³¹ Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tũpa mboeteisa pipe. ³² Supi eté ndapemboyecuai chira pe recocuera, que judío upe, que ndahei vahe judío yuvĩrecoi vahe upe, anise que Jesús reroyasar yuvĩrecoi vahe upe avei. ³³ Che opacatu che rembiapo pipe aipota ité mbahe tupri apo ãgua opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota iñepisiro ãgua yuvĩreco.

11

1 Che raquicue moñá catu peye inungar che asaquicue moña Cristo vichico.

Mara ehira cuña Jesús reroyasar ñemonuhasave yuvĩreco yepi

² Che rivireta, che, “Aviye ité yuvĩrecoi” ahe pẽu yepi che rese pemahenduha vitesse iyavei peguataño vitesse che opombohe vahe agüer rupi. ³ Che rumo aicua uca tupri pota pẽu, Cristo niha secoi ñepeipei cuimbahe cuaisar, cuimbahe evocoyase güembireco cuaisar secoi. Ëgüe ehi avei Tũpa Guahir Cristo upe. ⁴ Acoi cuimbahe Cristo upe ñemonuhasave oãca ndiru ndosequiise oyerure ãgua, anise Tũpa Ñhengagüer mombehu ãgua, ahe ëgüe ehi güerecuar Cristo mboeteiẽhisa pipe. ⁵ Iyavei acoi cuña ndoyopiise oãca oyeroci ãgua, anise Tũpa Ñhengagüer mombehu ãgua, ahe ëgüe ehi omer mboyeroyaẽhisa pipe. Ahe cuña evocoyase ndoyavi oñeapipa tupri vahe.

⁶ Acoi cuña ndoyopi potaise oãca, tayapecãraisa tupri. Ochĩse rumo oapecãrai ãgua, evocoyase toyopiño oãca sereco. ⁷ Cuimbahe rumo ndoyopii chira oãca sereco. Esepia, ahe Tũpa rahanga ité seci iyavei iporañetesa omboyecua ité oyese. Cuña rumo omboyecua omer recocuer oyese yuvireco. ⁸ Esepia, Tũpa oyapose cuimbahe, ndahei cuña sui vinose, cuimbahe sui niha cuña oyapo. ⁹ Iyavei ndahei cuña upe nara Tũpa oyapo cuimbahe, ahe rumo oyapo cuña cuimbahe upe nara. ¹⁰ Co rese cuña virecora oãcapisa omer mboyeroyasa mboyecua ãgua omahese Tũpa rembiguai eta yuvireco sese. ¹¹ Yande, yande Yar reroyasar yaico vahe co tecocuer rese, yañepitívii oyoya yaico. Evocoyase cuimbahe ndoicatu cuña porẽhi; cuña avei ndoicatu cuimbahe porẽhi yuvireco. ¹² Esepia, yepe supi eté cuimbahe sui yapopri cuña. Ipare rumo cuña sui oha cuimbahe; opacatu rumo oyoya Tũpa suindar yuvirecoi.

¹³ Evocoyase peyapisaca tupri co rese: ¿Iya pĩha cuña noñeacapii vahe oyerure Tũpa upe? ¹⁴ Yande ité yaicua yemochisa cuimbahe oyemboha vucuse. ¹⁵ Cuña rumo oviharete oha vucu porañetesa rese. Esepia, chupe imondopri ité ñacapi ãgua. ¹⁶ Acoi ava iñehe-ñehe tẽi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús reroyasar ãgũe ehi avei yuvireco.

Yande Yar rese yemomahenduha raisa

¹⁷ Co ambuae mbahe rese rumo ndaicatu eté, “Aviye tupri yuvirecoi” che he ãgua pẽu. Esepia, aipo pe ñemonuhasave, mbahe tẽi eté

aipo peyapo. ¹⁸ Esepia, yipindar che ayandu peñemonuhapase aipo oyese yande Yar mboetei ãgua pe pihañemoñetasa ndahoyoyai pipe peico. Amove ayanduse pe rerãcua, aroya ité. ¹⁹ ¡Iya ité revo pihañemoñetasa ndahoyoyai vahe reime ãgua pe pãhuve Jesús reroyasar supi tupri vahe cua tupri ãgua! ²⁰ Peñemonuhase pe pihañemoñetasa ndahoyoyai vahe pipe pe caru ãgua, ndahei yande Yar rese pe yemomahenduhaseve ãgüe peye. ²¹ Espia, aipo pecaruse, pe rane aipo pepoyava pecaru. Ambuae aipo evocoyase ndasiepoi tẽi yuvireco; ambuae rumo pe pãhu pendar aipo oyembosavaipoño yuvireco. ²² Pereco niha pe rãta aheve pe caru ãgua iyavei pe ihu ãgua. Pe rumo pe reco pipe opa peroĩro ambuae Jesús reroyasareta peico. Ipipe avei pemochi ava ndovirecoi vahe mbahe. ¡Che evocoyase, “Aviye yuvireco” ndahei chietera co mbahe pe rembiapo ai rese pẽu!

Yande Yar rese yemomahenduhasa supi ité vahe resendar

²³ Co ñehesa aipisi vahe yande Yar suindar amombehu vahe pẽu: ahe pĩtu pipe acoi Jesús mboguaisar opisi ãgua renonde, ahe oipisi pan. ²⁴ “Aviye ndeu” ohe pare Vu upe, ombohi-mbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco ãgua. Ëgüe peyera che rese pe mahenduhasa pipe peico” ehi. ²⁵ Ëgüe ehi avei ocarure yuvireco, ahe oipisi igua riru aipo ehi: “Co uva ricuer omboyecua pẽu Tũpa oyapora mbahe ipiasu vahe pe recorã. Che ruvi pipe rumo yaposara. Evocoyase co ari pipe suive peihuse co, peyemoma-

henduhara che rese yepi” ehi. ²⁶ Esepia, acoi pehuse co, peihuse avei, peyemomahenduhara, pemombehu aveira yande Yar mano agüer opacatu ava upe peico. Ēgüe peyera iyevî rãro peico.

Mara yahera yande Yar rese yayemomahenduhase

²⁷ Evocoiyase acoi ava ocaruño tēi vahe, yuvîroi huño tēi vahe avei Yar mboeteiēhisave, ahe evocoiyase nomboetei yuvîreco yande Yar rembiapocuer omondose güetecuer, iyavei oipiyerese vuvî.

²⁸ Sese tipîhañemoñeta rane oyacatu güecocuer rese ava co pan hu ãgua renonde, oihu ãgua renonde avei co uva ricuer yuvîreco.

²⁹ Esepia, acoi peyemomahenduhaēhisave co setecuer rese pehuse iyavei peihuse, ahese mbahe naporai vahe peseca peyeupe nara peico. ³⁰ Ichui niha setá pemaheasi, oime setá nipirata iri vahe avei pe pãhuve, oime avei omano vahe pe pãhu pendar.

³¹ Yande pîhañemoñeta tuprise rumo yande reco ãgua rese, yande Yar evocoiyase nomoimeî chira mbahe tēi yandeu evocoiya yande recosa pipe.

³² Yande Yar rumo oicua yande rembiapo ai. Sese omoime mbahe tēi yandeu. Yande reco mohîvi tupri ãgua rumo ěgüe ehi yandeu, ndahei yande cañî ãgua opacatu ava viroyasarēhi reseve.

³³ Sese, che rivîreta, acoi peñemonuhase peyemomahenduha ãgua yande Yar rese, peñearo ranera oyoya guasu pe caru ãgua. ³⁴ Acoi ava ndasiepoise yuvîreco, tocaru rane güētave. Ahese yuvîrasose ñemonuhasave, ndipoi chira mbahe

chupe. Iyavei che asose eipeve pe repia, opara ambuae mbahe amoingatu vicho pëu.

12

Mbahecuasa Tūpa Espíritu suindar

¹ Che riviřeta, che aicua uca pota pëu co mbahecuasa resendar ñepei-pei pëu Espíritu omondo vahe.

² Pe niha cūritei peicua tupri ité yipindar Tūpa rese peicoēhi vřtese, peyembopa uca mbahe rahanga ēgüe ehi tēi, noñehei vahe upe peico. ³ Sese, che aipota peicua acoi ava iñehe mara Jesús upe ndahei Tūpa Espíritu pĩratasa pipe ēgüe ehi. Iyavei ava ndoicatuĩ chira, “¡Jesús che Yar secoi!” ohe āgua opiha pipe Espíritu Santo ndovirecoise.

⁴ Oime setá ambuae-ae tēi mbahecuasa Espíritu suindar yande Jesús reroyasar yaico vahe upe nara, ahe Espíritu rumo ñepeiño ité imondosar secoi. ⁵ Setá mbahe avei oime mbahe yayapo vaherā yande Yar upe. Ahe yande Yar rumo ñepeiño ité secoi. ⁶ Iyavei setá oime ambuae mbahe Tūpa oyapo vahe yande rese opĩratasa pipe, Tūpa rumo ñepeiño ité secoi. Ahe oyapo opacatu co mbahe ñepei-pei yande rese. ⁷ Ahe omboyecua yande Espíritu rerecosa ñepei-pei yandeu opacatu yande reco tupri āgua. ⁸ Espíritu pĩratasa pipe Tūpa omondo ñepei vřroyasar upe iñehe āgua aracuasa rese iyavei ambuae upe omondo iporombohe tupri catu āgua ombahecuasa pipe. ⁹ Ambuae upe evocoyase omondo oyese yeroya tupri catu āgua oEspíritu pipe sui avei. Iyavei ambuae upe omondo opĩratasa imbaheasi vahe mbogüera āgua.

¹⁰ Ambuae oipisi pĩratasa mbahe poromondiisa oyapo vaheṛã yuvireco. Ahe ichui avei vireco ambuae ava omombehu vaheṛã ñehesa Tũpa suindar yuvireco. Ambuae upe Tũpa omondo mbahecuasa espĩritu naporai vahe iyavei Espĩritu supĩ tupri vahe cua tupri ãgua. Ambuae evocoyase ichui avei oicatu ñehesa ndicuasai vahe Tũpa suindar pipe oñehe ãgua. Ahe ichui avei ambuae oicatu ahe ñehesa ndicuasai vahe mombehu tupri ãgua ava upe. ¹¹ Ëgũe ehi Espĩritu ñepeĩño ité gũemimbotar rupi omondo ñepeĩ-pei yande Jesús reroyasar yaico vahe upe co mbahecuasa.

Opacatu Cristo rese yaico vahe ñepeĩño ité yande recocuer

¹² Inungar yande retecuer resendar setá mbahe oime viña, ahe rumo ñepeĩño ité; ãgũe ehi avei Cristo. ¹³ Ëgũe yahe avei opacatu, yepe yande pãhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepeĩ vahe nungar yande reco ãgua Espĩritu ñepeĩ vahe pipe. Ahe ñepeĩ Espĩritu avei opa yaipisi.

¹⁴ Supi eté yande rete resendar ndahei ñepeĩ mbahe, setá rumo mbahe. ¹⁵ Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tẽi ndaseco iri chira yande rete rese. ¹⁶ Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tẽi ndaseco iri chira yande rete rese! ¹⁷ Esepia, opacatu tupri yande rete

sesa pãve tẽise, ndayasendui chietera evocoyase mbahe viña. Anise, yande rete yapısacuar pãve tẽise, ndayasẽtui chietera evocoyase mbahe viña. ¹⁸ Tũpa rumo ñepeï-peï yande rese mbahe omondo senara rupi tupri güemimbotar rupi. ¹⁹ Yande opacatu ñepeï ava rete resendar nungar pãve tẽise, ndahei evocoyase opacatu tupri ava rete nungar yaico. ²⁰ Supi eté yepe setá mbahe yande rete rese, ñepeïño ité rumo yande rete.

²¹ Iyavei que yande resa ndiyai aipo ehira yande po upe: “¡Nde ěgüe ere tẽi vahe eico!”; anise que yande ãca avei, “¡Nde ěgüe ere tẽi vahe eico!” ndehi chira yande pi upe. ²² Esepia, yande rete resendar mbahe aviye nipiratai vahe yandeu, ahe sese rumo yayeroya catu. ²³ Iyavei yande rete rese mbahe ndayasaisu tupri vahe, ahe rumo yamboyemonde tupri ai sereco. Iyavei no yande rete resendar mbahe ndayamboyecuai vahe ava rembiepiave, ahe yayopi tupri sereco. ²⁴ Oime rumo ambuae yande rete resendar ndayayopii vaherã. ěgüe ehi Tũpa yande rete resendar mbahe imoingatu tupri. Evocoyase yande rete resendar mbahe ndayasaisu tupri vahe imboeteipri catu secoi. ²⁵ Tipo eme pihañemoñetasa ndoyoyai vahe pe pãhuve. Oyoya pehañeco tupri ñepeï-peï peyese peico. ²⁶ Evocoyase que ñepeï yande pãhu pendar upe mbahe tasise, opacatu ambuae upe avei tasi; anise que ñepeï imboyeroyapri secoise, ambuae avei opacatu oyemboviha yuvireco sese.

²⁷ Supi eté pe inungar Cristo rete peico. ěgüe peye ité ñepeï-peï chupendar ité peico. ²⁸ ěgüe ehi Tũpa iporavo viroyasar pãhuve, “Toime rane

yipindar apóstol; ipare toime ava che ñehengagüer mombehu ãgua, ichui ambuae upe iporombohe ãgua, ipare ambuae mbahe ndayasepiai vahe apo ãgua, iyavei ambuae ava imbaheasi vahe mbogüera ãgua, ambuae ava pĩtĩviisar tasecoi, ambuae ava recocuer reroguata tupri ãgua tasecoi, ambuae ava evocoyase toñehe ñehesa ndicuasai vahe pipe” ehi. ²⁹ Ndahei rumo opacatu ava apóstol yuvirecoi, iyavei ndahei opacatu Tũpa ñehe mombehusar yuvirecoi, ndahei opacatu oporombohe yuvireco, ndaopacatui avei oyapo mbahe ndayasepiai vahe yuvireco, ³⁰ ndahei opacatu vireco pĩratasa oporombogüera ãgua yuvireco, iyavei ndahei opacatu ndicuasai vahe ñehesa Espĩritu suindar pipe oñehe yuvireco, ndaopacatui avei oicua evocoi ñehesa renducua uca ãgua ambuae ava upe yuvireco. ³¹ Peseca ru Espĩritu suindar mbahecuasa aviye catu vahe peyeupe nara.

Yembohesa yande poroaisu ãgua resendar

Che rumo amombehura tecocuer aviye catu vahe pẽu.

13

¹ Yepe yande yañeheño tẽise ambuae ava ñehe ndayaicuai vahe pipe, iyavei Tũpa rembiguai ñehe pipe avei viña, ndayasaisuise rumo ava ipipe, yande evocoyase ěgüe yahe tupri tẽi inungar mbahe guarepochi apopri siapu iteanga vahe, iyavei inungar acoi platillo siapú rai tẽi vahe, ěgüe yahe tẽi yaico. ² Iyavei yepe yamombehuño tẽise Tũpa suindar ñehesa ou vahe yandeu viña,

iyavei yepe yaicuae mbahe opacatu icuapirēhi Tūpa suindar yaico, yarecose avei yande aracuasa opacatu yandeyese, iyavei yepe yande Tūpa rese yeroya pipe yarosirira ivitri guasu senda sui viña, ndayasaisuise rumo ava ipipe, yande evocoiyase ēgüe yahe tupri tēira yaico. ³ Iyavei yande mbahe opacatu yareco vahe yamboyo-yaho tupri tēise ava iparaisu vahe upe viña, iyavei yayoapi ucapa tupri tēise viña, ndayasaisuise rumo ava ipipe yaico, ndayande pitivii eté evocoiya yande reco agüer.

⁴ Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotarēhi ambuae ava mbahe potasave; “Che aviye catu vahe aico” ndehi avei, ndoyecomboivate ai eté, ⁵ ahe ndovirecoi eté oporomboeteiēhisa, ndahei oyeupe güeraño mbahe oipota, niñemoiro serai vahe, ahe rumo iñero voiño ambuae ava upe. ⁶ Ndahei mbahe tēi rese oyemboviha; ahe rumo oyemboviha mbahe supi tupri vahe rese. ⁷ Oporoaisusa virecose oñemosañño opacatu uve, oyeroya vite sese, osãro vite mbahe tupri ichui, iyavei seco mbegüe viteño chupe.

⁸ Poroaisusa niha ndopai vahe ité. Oyepotara ari ipapapri coiye, ahese ndayamombehu iri chira Tūpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiaveira yande mbahecua. ⁹ Esepia niha, yaicua raimi tēi mbahe iyavei chñhi raimi tēi yamombehu Tūpa Ñehengagüer. ¹⁰ Acoi ouse rumo oicuapa tupri vahe mbahe, ahese ndahe iri chira yaicua raimi tēi vahe yaiporura.

¹¹ Esepia niha, chĩhivahe vite yande recose, yañehe, yandepihañemoñeta, yasenducua mbahe chĩhivahe nungar; yacuacuase ité rumo cute, yaseyapa chĩhivahe yande reco agüer. ¹² Cũritei yande ndayasenducua tuprii Tũpa resendar mbahe, inungar acoi yepiasa pĩpe yasepia hãvomi tẽi que mbahe; oyeovai eté yaicose rumo, yasenducua tupri catu itera mbahe evocoyase. Cũritei rumo yaicua raimi tẽi mbahe Tũpa suindar yaico; coiyerumoye yaicua tupri catu itera, inungar ahe oicua tupri ité yande recocuer.

¹³ Co oime mbosapi mbahe ndopai vaheerã, ahe: Tũpa rese yande yeroyasa, mbahe yande remiaro ivave oime vahe iyavei yande yeaisusa; co imombosapisa rumo aviye catú vahe ité ambuae sui yandeu, ahe yeaisusa.

14

Yaseca catura Tũpa suindar ñehesa mombehu ãgua

¹ Peseca catu pe yeaisu tupri ãgua peico; aheseve avei peipotara mbahecuasa Tũpa Espĩritu remimbou. Ichuindar ñehesa mombehu ãgua rese catu ité rumo peicora. ² Esepia, acoi ava oñehe vahe ñehesa ndayaicuai vahe pĩpe, Tũpa upe ité evocoyase oñehe; ndahei ava upe tẽi oñehe. Esepia, ndipoi eté ava iñehe renducupar. Ahe rumo oñehe mbahe ndicuasai vahe rese oespĩritu pĩpe. ³ Acoi ava omombehu vahe rumo Tũpa suindar ñehesa yasenducua vahe pĩpe, ahe oipĩtivii ambuae ava Tũpa rese iyeroya ãgua, oporomonguerẽhi catu, oporombovĩha catu avei. ⁴ Acoi ava oñehe vahe

rumo ñehesa ndayaicuai vahe pipe, ahe ae tēi vireco catu Tūpa rese opihañemoñetasa. Acoi ava omombehu vahe rumo Tūpa suindar ñehesa icuapri ité, ahe ombopihañemoñetá catu Tūpa rese Cristo reroyasar yuvirecoi vahe.

⁵ Yepe aipotara opacatu pe ñehesã agua ñehesa ndayaicuai vahe pipe pēu viña, aviye catu rumo pemombehura Tūpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tupriã agua, ahese aviyeño oñehes Jesús reroyasar rovaque. Ipipe sui ipihañemoñeta catura Tūpa rese yuvireco. ⁶ Sese, che rivireta, asose pe repia, añehese co ñehesa ndayaicuai vahe pipe pēu, ndapesenducuai chira che ñehes viña. Amombehuse rumo Tūpa oicua uca vahe cheu que mbahecuasa supi tupri vahe resendar, anise que ñehesa Tūpa suindar, anise que ambuae porombohesa, ahese pesenducua viña.

⁷ Mbahe yande remimombehu rumo inungar acoi mbahe porasei recasar imoñehepri viña, inungar mimbi, arpa avei. Esepia, ndoyoya tupriise iñehegüer yuvireco, ndayasenducuai eté evocoyase mbahe-mbahe sapucaisa osãha yuvireco. ⁸ Anise co inungar mimbi nomoñehes tupriise vavasave nara yuvireco viña, ndipoi chietera que ava oyemoingatu voi vaherã ovavaã agua viña. ⁹ Ëgüe peye avei niha peico peñehes ava upe ñehesa ndayasenducuai vahe pipe, ahe evocoyase osenduño tēi, ndosenducuai eté rumo pe ñehes yuvireco. ¡Evocoyase peñehes tēi eté! ¹⁰ Supi eté, setá iteanga co ivi pipe oime

ambuae-ae tēi ava ñehesa. Oime avei rumo ava osenducua vahe aipo nungar ñehesa. ¹¹ Acoi ndayasenducuaise rumo ambuae ava ñehe, yande evocoyase inungar ambuae tecua pendar tēi yaico vahe chupe; yandeu avei evocoyase ahe ava inungar ambuae tecua pendar tēi yuvirecoi vahe. ¹² Pe niha peipota ité pereco vaherã mbahecuasa Tūpa Espíritu suindar yepi. Sese peporandu catu mbahecuasa Espíritu suindar rese opacatu Jesús reroyasar pĩtivĩ ãgua Tūpa rese yuvirecoi tupri catu vaherã.

¹³ Sese acoi ava oñehe vahe ñehesa ndayaicuai vahe pipe, toporandu rane Tūpa upe ambuae ava upe senducua uca tupri ãgua rese. ¹⁴ Esepia, acoi yayeroquiño tēise Tūpa upe ñehesa ndayasenducuai vahe pipe, yayeroqui yande espíritu pipe, ndayasenducuai rumo yande yeroqui. ¹⁵ ¿Mara yahera vo evocoyase? Yayeroqui yande espíritu pipe, yande aracuasa pipe avei. Yasapucaira yande espíritu pipe, yande aracuasa pipe avei no. ¹⁶ Esepia, acoi Tūpa upe, “Aviye ndeu” yahese yande espíritu pipe güeraño, evocoyase ava ndosenducuai vahe, oyemboyase yande rese iyavei osenduse yande yeroquisa, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco. ¹⁷ “Aviye ndeu” yande hesa, aviyeteramo aviyera Tūpa upe viña, ambuae ava rumo osenduse, noipĩtivĩ chietera Tūpa rese imbopihañemoñeta catu ãgua senducuaēhi pipe. ¹⁸ “Aviye ndeu” ahe Tūpa upe. Esepia, añehe catu ñehesa ndayaicuai vahe pipe opacatu pe sui. ¹⁹ Jesús reroyasar ñemonuhasave rumo aipota catu amombehu vaherã movĩromi

têi ñehesa yasenducua vahe ava mbohe ãgua setá ñehesa ndicuasai vahe pipe che ñehe rãgüer sui.

²⁰ Che rivireta, pepihañemoñeta eme chihivahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoẽhi ãgua. ²¹ Porocuita resendar icuachiapri aracahendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara ñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe. ²² Evocoyase co ñehesa ndayaicuai vahe pipe oñehese ava Tũpa pĩratasa pipe, ahe Jesús reroyasarẽhi yuvirecoi vahe upe nara: “¡Peicua catu, co supi tupri vahe!” he ãgua. Ndahei rumo ava Jesús reroyasar yuvirecoi vahe upendar. Ñehesa Tũpa suindar senducupri yamombehuse rumo, ahe, “Co supi tupri vahe” he ãgua Jesús reroyasar yuvirecoi vahe upe; ndahei ava seroyasarẽhi yuvirecoi vahe upendar. ²³ Evocoyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pipe tẽi, ipare yuviroiquese pe pãhuve Jesús reroyasarẽhi ndosenducuai vahe Tũpa suindar mbahe yuvireco, “¡Opacatu co ndayaracuai vahe tẽi yuvireco!” ehira yuvireco pẽu. ²⁴ Opacatu rumo peñehese Tũpa suindar ñehesa yasenducua vahe pipe, yuviroiquese evocoi nungar ava yuviraso pe pãhuve, ahe ae evocoyase, “Supi eté ayavi che recocuer Tũpa rovaque” ehira pe ñehe renduse yuvireco.

²⁵ Ëgüe ehira opihañemoñeta rai ndoyecuai vahe imboporẽhipa uca oyeupe pe ñehe rendu ramosse yuvireco. Ipípe sui omboeteira Tũpa yuvireco. Ahese, “Supi eté catu Tũpa ité pereco peyese” ehira yuvireco pẽu.

Yayapora mbahe opacatu yande cuaita rupi ñemonuhasave

²⁶ Sese che rivireta, peñemonuhase, oime pe pãhu pendar osapucaí pota vahe sapucaisa Tũpa upendar, ambuae evocoyase oipota ité ava mbohe yuvireco, anise ambuae omombehu pota ava upe mbahe oyeupe omboyecua uca vahe Tũpa, ambuae oipota ité oñehe ñehesa ndicuasai vahe pípe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesús reroyasareta seroya catu ãgua yuvireco. ²⁷ Acoi ava oñehese ñehesa ndayaicuai vahe pípe, toñehe ñuvirío güeraño yuvireco, anise que mbosapí ñepei-peí rupí; ñepei evocoyase osenducua ucara iñehe ava upe oico. ²⁸ Acoi ndipoise ité rumo ambuae ava ahe ñehesa ndayaicuai vahe renducua uca ãgua, ndiyai ahe oñehera yuvireco pe ñemonuhasave; oyeupeñomi evocoyase ahe oñehera ipípe yuvireco Tũpa upe. ²⁹ Ëgüe peye tuprí aveira pemombehuse Tũpa suindar ñehesa ambuae ava upe, peñehera ñuviriomi, anise mbosapí. Ambuae evocoyase pe pãhu pendar oyapísaca tupríra sese yuvireco ‘¿supi eté pĩha?’ ohesave. ³⁰ Que ñepei oñehe vitesse Tũpa oicua ucase mbahe ambuae ava upe, topituhuño yipindar oñehe vahe, ambuae evocoyase toñehe

pẽu. ³¹ Evocoyase ãgũe peyera peñehe ñepei-peí opacatu ambuae osendu vahe mbohe ãgua iyavei imonguerẽhi catu ãgua. ³² Acoi omombehu vahe ñehesa Tũpa suindar, ahe oicatu oñehe mombituhu ãgua. ³³⁻³⁴ Esepia, Tũpa secoi mbahe aviye vahe aposar, ndahei ndoyembohe catui vahe.

Ndiyai cuña upe iñehe ãgua pe ñemonuhasave. Esepia, ãgũe ehi avei opacatu ambuae Jesús reroyasar ñemonuhasa rupi yuvireco. Evocoyase ndiyai eté aheve iñehe ãgua yuvireco chupe. Iyacatu rumo ahe imboyeroyapri yuvirecoira omer upe Tũpa porocuita rupi. ³⁵ Oicua potase que mbahe, iya omer upe oporandura gũètave yuvireco. Esepia, cuña upe ndiyai eté iporandu ãgua mbahe rese pe ñemonuhasave.

³⁶ Peyapisaca catu co ñehesa rese. Ndahei niha pe rane pemombehu Tũpa Ñehengagũer ava upe peico, ndahei avei pẽuñomi ou Tũpa suindar ñehesa. ³⁷ Acoi que pe pãhuve oimese “che Tũpa Ñehengagũer mombehusar aico” ehiño tẽi vahe, anise que “aicua Espĩritu suindar mbahe” ehi vahe, iya rumo oicua tupri co aicuachía vahe imondo pẽu, ahe yande Yar porocuita resendar. ³⁸ Ahe ndoyapisaca potaise rumo che ñehe rese, iñehe rese evocoyase ndapeyapisacai chira.

³⁹ Sese, che rivireta, peyemonguerẽhi catu Tũpa suindar ñehesa icuapri vahe mombehu ãgua peico. Ndiyai rumo ndapeipotai ambuae ava upe ñehesa ndayaicuai vahe pipe iñehe ãgua. ⁴⁰ Peyapora rumo opacatu mbahe ñepei-peí pe cuaita rupi mbahe tupri pipe.

15

Cristo cuerayevi agüer

¹ Che rivireta, che aipota peyemomahenduha acoi ñehesa pĩsirosa resendar pẽu mombehu vahecuer rese. Co ñehesa niha peipisi. Ipipe sui avei niha peyemoviracua peyese. ² Seroya pipe niha peñepisiro peico peyemoviracuase sese. Egüe ndapeyese rumo, peroya tupri tẽi.

³ Acoi ñehesa aipisi vahe, opa uca aicua pẽu. Esepia, ahe aviye catu vahe: Cristo omano yande angaipa repirã Tũpa Ñehengagüer icuachiapri rupi eté ⁴ iyavei oñoti sehõgüer yuvireco. Ipare rumo, imombosapisa ari pipe, ocuerayevi iri icuachiapri rupi eté avei. ⁵ Ichui oyemboyecua Pedro upe. Ipare voi oyemboyecua apóstol yuvirecoi vahe upe. ⁶ Ichui oyemboyecua quiniento sui setá catu vahe viroyasar upe. Evocoyase oyoya guasu osepia yuvireco. Setá vite rumo sepiasarer yuvirecove vite cũritei; amove rumo ambuae opa omano yuvireco. ⁷ Coiye oyemoporẽhi Santiago upe. Ipare opacatu apóstol once yuvirecoi vahe upe.

⁸ Cheu avei ipa ité oyemboyecua cute, aviye evocoyase che ipá oha vahe aico seroya ãgua. ⁹ Esepia, che seco ivi coti catu vahe opacatu ambuae apóstol sui aico. Iyavei ndacheãroi eté apóstol che reco ãgua viña. Esepia, che yipindar seroyasar aseca-seca catu vahe mara-mara tẽi sereco ãgua. ¹⁰ Che rumo apóstol ité aico. Esepia, Tũpa oyapo mbahe aviye vahe ité cheu; che rovasa oico. Evocoyase che recocuer osecuñaro ité sereco. Ichui che aporaviqui catu ité opacatu ambuae

apóstol sui. Ndahei rumo cheyesui tēi ěgüe ahe vichico, Tūpa rumo oporovasasa pīpe secoi che rupi. ¹¹ Ndapepihañemoñetai chira rumo acoi oporaviqui catu vahe rese tēi. Co ñehesa Cristo recocuer resendar ore oromombehu vahe rese rumo pepihañemoñeta catura. Esepia niha, ahe peroya vahe ité peico.

Ava omano vahe cuerayevisa

¹² Oromombehu ité niha Cristo cuerayevi agüer resendar pēu. Oime rumo amove pe pāhu pendar, “¿Mahera aipo ocuerayevira omano vahe yuvireco viña?” ehiño yuvireco. ¹³ Ndocuerayevise ité rumo ava omano vahe viña, Cristo avei evocoyase ndocuerayevii chietera viña; ¹⁴ iyavei Cristo ndocuerayevise viña, ore secocuer oromombehu vahe evocoyase ěgüe ehi tēi etera viña. Iyavei pe yeroyasa Cristo rese ěgüe ehi tēi aveira viña. ¹⁵ Acoi ěgüe ehise ité rumo viña, ore avei evocoyase oroñehẽño tēi etera Tūpa resendar ñehesa rese oroico viña. Esepia, “Tūpa Cristo ombogüerayevi” orohe ité imombehu ava upe oroico. Ndocuerayevise ité rumo omano vahe yuvireco viña, ahese Tūpa nombogüerayevii chiaveira Cristo viña. ¹⁶ ěgüe ehi eté, acoi omano vahe ndocuerayevise yuvireco viña, Cristo avei evocoyase ndocuerayevii chietera viña; ¹⁷ Tūpa rese pe yeroyasa evocoyase ěgüe ehi tēi vahe itera viña; angaipa pīpe viteño tēi evocoyase pe recocuer viña. ¹⁸ Iyavei acoi ěgüe ehise ité viña, evocoyase omano vahe Cristo reroyasar, ahe avei ocañi tēira viña. ¹⁹ Ndipoise yasãro vaherã Cristo

suindar mbahe yamanose, yande evocoyase imbobapri tēi catu itera yaico opacatu ambuae ava sui yuvireco viña.

²⁰ Cristo rumo supi eté ocuerayeví omano vahe pãhu sui; ahe rane yipindar ocuerayeví vahe.

²¹ Esepia, ñepi ava rembiapo sui oime manosa yandeu. Evocoyase ñepi ava rembiapo sui avei yacuerayevira.

²² Esepia, inungar acoi Adán rembiapo ai sui ava opacatu omano yuvireco, êgüe ehi aveira Cristo rembiapo sui opacatu ava sese yuvirecoi vahe virecora tecovesa yuvireco.

²³ Ñepi-pei yandeu imombehusa rupi; yipindar Cristo ocuerayeví, ichui yande seroyasar yaico vahe yacuerayeví aveira sese acoi ahe oyevisi curi.

²⁴ Ahese oura ari ipa vahe cute. Yipindar rumo Cristo omocañipara opacatu seco pĩrata êgüe ehi tēi vahe. Ipare omondora opovri pendar Vu Tũpa upe.

²⁵ Ahe rane ité rumo opacatu oporocuirai oico acoi Tu opase voi eté omondo opacatu yamotarẽhimbar ipovrive.

²⁶ Ahese ipa manosa opa itera. ²⁷ Esepia, Tũpa osecopi opacatu mbahe imondo ipovrive, “Opacatu ité mbahe secopiri” ehise. Ndahei rumo Tu Tũpa avei secoi ipovrive.

Esepia, Tu ité opacatu mbahe osecopi imondo ipovrive. ²⁸ Evocoyase, opase mbahe imondosa ipovrive, ahe ae evocoyase oyemondora Vu Tũpa povrive. Tu evocoyase secoira ivate catu vahe opacatu mbahe sui.

²⁹ Ndipoise omano vahe cuerayeví ãgua yuvireco viña, ¿mbahe rese pĩha evocoyase omanose ava, amove chupe nara tēi ambuae oñeapiramo uca yuvireco? Esepia, omano

vahe ndocuerayevise yuvireco viña, ¿mahera ru evocoyase ahe ava oñeapiramo uca chupe yuvireco? ³⁰ Iyavei ore no, ¿mahera ru evocoyase oroyemondora mbahe tēi upe ari rupi viña? ³¹ Supi eté, che rivireta, ari yacatu avīye che amano vaherã opacatu co mbahe tēi sui. Ahe pīpeve avei rumo che areco ité che viharetesa pe rese yande Yar Jesucristo rese che recose. ³² Oime mbia Efeso pendar mbahe tēi eté oyapo yuvireco cheu. Avīye acoi mahembiar oñaro ai vahe rese avava vahe vichico. Acoi omano vahe ndocuerayevise rumo yuvireco viña, evocoyase ichui ndipoi chietera mbahe avīye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

³³ Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe piri peicose, ahe evocoyase virovara pe reco tupriša” ehi vahe. ³⁴ Pepihañemoñeta tupri iri, peyemboangaipa uca iri eme. Esepia, amove pe pãhu pendar oime ndoicuai vahe ité Tũpa yuvireco. Che aipo ahe ité pēu ‘toyuvinochi che ñehe osenduse yuvireco’ viya.

Yande retecuer cuerayevisa resendar

³⁵ Aviyeteramo pe pãhu pendar oimera oporandu vahe: “¿Mara ehira pĩha omano vahe ocuerayevi irise yuvireco coiyé? ¿Mara ehi angahura pĩha setecuer ahese yuvireco?” ehira yuvireco oyeupe. ³⁶ ¡Pe aipo peye-peye tēi peico! Esepia, mbahe rãhiñi yañotise, ituyu rane ité sorí ãgua. ³⁷ Yañotise mbahe, sãhiñi rane ité yañoti; ndahei

ihĩ opacatu reseve yañoti. ³⁸ Ipare rumo Tũpa omondo ahe mbahe rãhiĩ upe ihĩguã güemimbotar rupi, iyavei ambuae mbahe rãhiĩ yacatu omondo ihĩguã. ³⁹ Ndahoyoyai rumo que ñepei mbahe miti hi ambuae mbahe miti hi rese. Ëgüe yahe avei yande yaico vahe ambuae ité yande rete mbahe mimba sui; vĩrai rete ambuae ité iyavei pira rete ambuae tẽi no. ⁴⁰ Ëgüe ehi avei niha, oime iva pendar rete, ivive ava yuvirecoi vahe rete avei no. Iva pendar rete catuprigüer rumo ndahoyoyai eté ivi pipendar rete rese. ⁴¹ Ari rendigüer avei ndahoyoyai yasi rendigüer rese, yasitata rendigüer rese avei. Ñepei yasitata ambuae yasitata rese ndahoyoyai avei sendigüer yuvireco.

⁴² Ëgüe ehi aveira niha omano vahe cuerayevisa; yañotise sehögüer, ahe ituyu vahe rã. Ocueraevise rumo ndituyu iri chietera; apirẽhi vahe rã ité secoira. ⁴³ Tehögüer ñotimbrĩ nimoburusai vahe; coiye ocueraevise rumo, imboeteipri ité secoi. Acoi ava rehögüer oñoti vahe yuvireco, nipirata iri eté oico, coiye ocueraevise rumo, ipirata itera. ⁴⁴ Supi eté, acoi ava rehögüer ñotisa vahe, ahe co ivi pipendar tẽi setecuer. Ocueraevise rumo, setecuer iva pendar secoira. Esepia, oime ité ivi pendar setecuer, oime avei iva pendar setecuer.

⁴⁵ Supi eté aipo ehi icuachiapri aracahendar pipe: “Yipindar ava Adán serer vahe. Ahe sete upe ombou Tũpa secove ãgua co ivi pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa iva pendar ava upe imbou ãgua. ⁴⁶ Yipindar oime co ivi pipendar

tecovesa. Ipare rumo oime co tecovesa iva pendar yandeu. ⁴⁷ Ëgüe ehi yipindar ava ivi sui yapopri, ivi rese nara ité icuaita oico; coiye catu ava ou vahe evocoyase iva pendar. ⁴⁸ Inungar yipindar ava ivi suindar, ëgüe ehi avei opacatu ava ivi suindar tecovesa rereco yuvireco. Iyavei inungar Jesús iva suindar, ëgüe ehi aveira opacatu iva suindar tecovesa vireco vahe yuvireco.

⁴⁹ Iyavei inungar cūritei Adán nungar tupri yaico; ëgüe yahe aveira yande Jesucristo iva pendar nungar tupri yaico curi.

⁵⁰ Che rivireta, co mbahe amombehu potami pëu: acoi ava upe güetecuer reseve, ndiyai eté seique água ivave Tūpa mborerecuasave. Esepia, co yande rete ocañi tēi vaherā, ndoipisi chira tecocuer apirēhi vahe. ⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapara. ⁵² Mimbì moñehese voi yande resapihara inungar yande resapiqui vahe, ëgüe ehira secuñarosapa yande rete. Aheseve avei omano vahe ocuerayevipara apirēhi vaherā ité yuvireco; yande evocoyase nayamano vītei vahe, opaño tēira yande rete secuñarosa. ⁵³ Esepia, co yande rete ocañi tēi vaherā, ahe yande rete niha opara oñecuñaro apirēhi vaherā yuvireco. ⁵⁴ Ëgüe ehise yandeu, ahese ramo osupitira Tūpa ñehe icuachiapri pipe imombehupri yandeu curi: “Manosa opara imocañisa” ehi vahe. ⁵⁵ Iyavei aipo ehi: “Ndayasiquiye iri chira yande mano água. Esepia, manosa ndovireco iri chira oyeroyasa oyese inungar acoi cau popiar opa vahe se-

rocuasa ichui” ehi. ⁵⁶ Angaipa niha inungar mbahe popiar omoime vahe manosa yandeu. Moisés porocuita aracahendar evocoyase ombou pĩratasa angaipa upe angaipa aposar mocañi uca ãgua. ⁵⁷ Che rumo, “¡Aviye ndeu!” ahe Tũpa upe. Esepia, ahe ombou angaipa recopi ãgua yandeu yande Yar Jesucristo rembiapo sui.

⁵⁸ Sese, che rivireta, peico tupriño ité Cristo rese iyavei peyemoviracua opacatu mbahe tẽi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei ãgũe ehi tẽi vahe.

16

Porerecosa Jesús reroyasar pĩtĩvi ãgua resendar

¹ Iyavei co guarepochi monuha ãgua iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe. ² Domingu yacatu iya pe avei peipeha voimi guarepochi peico pe poraviqui repri sui yapocatu ãgua. Eipeve che yepotase, ndapeyemañeco iri chira guarepochi monuha ãgua rese peico. ³ Evocoyase acoi ayepotase eipeve vicho, amondora ava pe rembioporavo Jerusalén ve. Che ñehe icuachiapri avei amondora chupe guarepochi pe remimonuha reraso ãgua yuvireco ahe pendar yuvirecoi vahe upe. ⁴ Aviyeteramo, iyase cheu, che avei asora aheve. Evocoyase ahe yuvirasora che rupi.

Pablo ipihañemoñeta oguata ãgua rese

⁵ Che sose, asora ivi Macedonia rupi, ipare asora pe repia Corinto ve. ⁶ Aviyeteramo apita pucumira

pe piri, anise aviyeteramo pe piri ve ité mbahe porañehi che mombitañora. Ipare pe che pítiviñomira peye eipeve sui ambuae tecuave che so água rese. ⁷ Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri. ⁸ Che rumo cūritei apitaño vitera cohava Efeso ve, asepia ranera Pentecostés pieta. ⁹ Esepia, oime ité yande Yar upe che poraviquisa aviye vahe ité cohava, yepe setá iteanga ava che amotarēhimbar yuvirecoi viña.

¹⁰ Acoi Timoteo oyepotase oso pe piri, taseco tupriño ité pe pãhuve. Esepia, ahe avei oporaviqui yande Yar upe nara oico che nungar. ¹¹ Tipo eme ñepi yepe sepia potañehisar yuvireco, iya rumo peipítivi catura che piri iyepota tupri água rese. Esepia, che iyavei ambuae Jesús reroyasar rese orosáro ité iyepota água oroico.

¹² Yande rivri Apolos upe, “Eso ambuae Jesús reroyasar piri Corinto ve” ahe tēi. Cūritei rumo niquerēhi oso pe repia; iyase chupe, ahese osora pe piri.

Pablo mahenduhasa ipa vahe

¹³ Pemahemoha peyese; peyemoviracua avei Jesús rese pe yeroyasa pipe. Peñemosañño catu pe cuaita upe. Peicoveño itera Tūpa pīratasa pipe. ¹⁴ Opacatu mbahe peyapo pota vahe, peyapora pe poroaisusa pipe ité.

¹⁵ Che rivireta, pe peicua Estéfanos opacatu güeta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri água yuvireco no. ¹⁶ Evocoyase che

aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

¹⁷ Pe pãhu pendar Estéfanás, Fortunato iyavei Acaico cohavé oyepotase che mbovîha yuvîreco. Esepia, ahe oyapo ité pe ndapeicatu tuprii vahe apo yuvîreco. ¹⁸ Ahe che monguerêhi catu yuvîreco, êgüe ehi avei revo pẽu no. Pemboeteira evocoi nungar ava peico.

¹⁹ Jesús reroyasar Asia pendar opacatu ombou omahenduhasa yuvîreco pẽu. Aquila, Priscila avei imahenduhá iteanga yuvîreco pe rese iyavei opacatu ambuae ava oñemonuha vahe ahe sêtave yuvîreco, ahe avei ombou omahenduhasa yande Yar rer pipe yuvîreco pẽu. ²⁰ Opacatu Jesús reroyasar coha pendar avei omondo omahenduhasa yuvîreco pẽu. Peyeovaupite catu pe reco maranehisa pipe ahe mahenduhasa mombehu peyeupe pe viharetasave.

²¹ Che Pablo, che po pipe ité aicuachía co che mahenduhasa imondo pẽu.

²² Acoi ava ndosaisui vahe yande Yar Jesucristo, ahe tocañi mbahe tẽi pipe. ¡Toyevi pihaiivi voi yande Yar ou!

²³ Yande Yar Jesucristo tape rovasa ité yepi.

²⁴ Pẽu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pẽu.

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022

c27c2d97-c359-59f5-b367-83efb2e33739